



Responstida er ofte avgjerande om ein skal berga ei hus i brann (Arkivfoto).

Saka om brannstasjonane kjem opp i møte i Formannskapet 6. februar og seinare i Kommunestyret. Rådmannen går for alternativ 3 med nedlegging av stasjonen i Uskedalen og på Fjelberg. Gunnar Myklebust har engasjert seg i saka med lesarbreve. Han synst det er ei feilvurdering av leinga i Brann og redning når ein snakkar om å kjøpa brannbåt med plass til ATV. Dette vil bli ein stor kostnad og vil ta så mykje av budsjettet at ein må leggja ned brannstasjonar, til dømes i Uskedalen. Gunnar skriv:

Brannbåt til 15 millionar ?

Det blir ikkje kjekt å sjå på eit hus som brenn i ein halvtime før nokon byrjar å sløkkja. Det blir også ekstra trist å få hjartestans etter at hjartestartaren er levert inn.

I Uskedalen har vi ein stabil gjeng med brannfolk som alltid har radioen i belte og er klare for å rykka ut. Godtgjersle for innsatsen er visst nok ca 1000 kr. kvar i månaden.

Brannmannskapa i Uskedalen er utstyrt med hjartestartar, oksygen og førstehjelpsutstyr og er kursa av Norsk Luftambulansse. Mannskapa har allerede gjort ein god innsats og potensialet for å berga liv er stort. Når ein fell om med hjartestans, er tidlig HLR og defibrillering avgjerande for utfallet. Brannstasjonen i Uskedalen ligg strategisk til for å hjelpa.

Kvinnherad er ein langstrakt kommune og eg forstår at det må gjerast prioriteringar, men eg trur det er lite å spara på å leggja ned brannstasjonane i Uskedalen og på Borgundøy. Men det er kanskje tøffare å kjøpa brannbåt ? Bergen har kjøpt seg brannbåt til ca 15 millionar, men den er kanskje litt liten og utan plass til ATV på dekk.

Eg oppmodar politikarane til å rekna og vurdera sjølve.

Tekst: Gunnar Myklebust/ Kristian Bringedal
Foto/nett: Kristian Bringedal